

## Liturgia dalla sontga Tscheina

<Cant: 132, 1.2.4>

### **(Beneventaziun)**

Jesus Christus gi: Vegni tier mei, vus tuts, che veis stenta e grevadetgna, e jeu vi sollevgiar vus. Amen.

Mt. 11, 28

### **(Entruidament – Admoniziun)**

Cars frars e caras soras en Cristus

la s. Tscheina ha Jesus instituiu en occasiun da siu davos past cun ses giuvnals. Sco el ha duront siu operar adina puspei encuriu la cuminonza cul cuncarstgaun, era cul malvesiu e sprezzau, aschia ha el aunc cun sia davosa tschavera accentuau quella cuminonza. Quella medema cuminonza vul el schaffir era denter nus oz che nus sesanflein cheu en siu num, e buca meins damaun e tut ils gis ella veta cotidiana. Il Segner envida nus tuts tier sia meisa, tut quels che s'enriclan da lur puccaus ed enqueran tier el il spindrament. El vul aschia renovar e rinforzar nus ella cardientscha ed ella carezia, ch'el vivi en nus e nus en el.

(Pertgei el vul s'unir cun nus, sco el ha empermess: Jeu sundel cun vus tut ils gis. jeu sundel il paun dalla veta.)

E sco il Segner retscheiva nus culpents alla meisa da sia grazia, aschia duein nus acceptar l'in a l'auter en capientscha e perdun. Tgi ch'ei tentaus da truar enzatgi, patratgi vid siu agen puccau. E tgi che sesenta sprezzaus ni bandunaus, sappi ch'el ei uss il hosp da Cristus. E sco Jesus ei staus solidars viers nus e nos pli profunds basegns, aschia vulein era nus emprender da capir e sustener ils basignus ed endironts.

Pertgei el gi: Vegni tier mei, vus tuts che veis stenta e grevadetgna. Jeu vi sollevgiar vus. Amen.

<preparar la sontga tscheina, evt. duront cant: Sogns, sogns, sogns>

**(evt. Sanctus)**

(Sogns, sogns, sogns eis ti, Segner, Deus dallas armadas. Tschiel e tiara ein pleins da tia gloria. Hosanna ellas altezias. Benedius ei quel che vegn en num dil Segner. Hosanna ellas altezias.)

**(Instituziun)**

Cars cuncartents,

Nus essan clamai, che nus celebreien en cuminonza dalla cardientscha, dalla speranza e dalla carezia la sontga Tscheina da nies Segner Jesus Christus. Tedleien ussa, co el ha salvau la sontga Tscheina e co el ha mussau a ses giuvnals da salvar ella:

*Quella notg ch'il Segner ei vegnius tradius, ha el priu il paun, ha engraziau, rut el e getg:*

*Quei ei miu tgierp che vegn ruts per vos. Fagei quei per regurdonza da mei.*

*Ed aschia ha el suenter la tscheina era priu il biher, ha engraziau e getg:*

*Quei biher ei miu saung, il saung dalla nova ligia, che vegn spons per biars per perdunament dils puccaus. Fagei quei, aschi savens sco vos bugeis, per regurdonza da mei.*

**(Misteri dalla cardientscha)**

*Segner, aschi savens che nus magliein da quei paun e buein da quei biher, (nus) annunziein nus tia mort e confessein nus tia levada entochen che ti tuornas en gliergia. Amen*

<Meditaziun sur la sontga Tscheina>

**(Uraziun e Bab nos)**

Perquei engraziein nus a ti, Bab en tschiel, per la veta ed il pitir da tiu feagl, per sia unfrenda silla crusch. Nus ludein sia levada, la victoria sur la mort. Ti has mussau ina gronda misericordia vid nus.

Avon che nus vegnin tier tia meisa, renovescha nus e nossa veta tras tiu spért sogn, tras il qual ti vuls pertgitar nus e tut ils fideivels.

Bendescha ussa quels duns entras tiu Spért, il paun dalla veta ed il biher dil salid, che nus retscheveien tras quels la veta perpetna. Reunescha tuts che han part dil tgierp e dil saung da Cristus, e tuts che laudan tei e glorificheschan tei tras tiu feagl Jesus Cristus.

Entras Cristus, cun el ed  
enten el ei a ti, Deus,  
Bab tutpussent, ell'unitad  
dil sogn Spért  
tutta honor e gloria  
da perpeten en perpeten.  
Amen

Durch ihn und mit ihm und in  
ihm ist dir, Gott, allmächtiger  
Vater, in der Einheit des  
heiligen Geistes alle  
Herrlichkeit und Ehre jetzt  
und in Ewigkeit.  
Amen

*Nus urein ensemen dad ault:*

Bab nos, ti che eis en tschiel ...

*Gemeinsam beten wir laut:*

Unser Vater, im Himmel ...

Amen

## **(Communiun)**

<Cant: Tschut da Deu / Christe, du Lamm Gottes>

Mirei il tschut da Deus che pren naven il puccau dil mund:  
*Segner, jeu sun buca vengonzs che ti vegnies sut miu tetg. Gi mo  
in plaid, e mia olma daventa sauna.*

<Comembers dalla suprastonza stattan si>

Il paun, che nus rumpein, ei la cuminonza dil tgierp da Christus.

<Dun als comembers dalla suprastonza>

Il benediu biher, che nus benedin, ei la cuminonza dil saung da  
Christus.

<Dun als comembers dalla suprastonza>

Sche vegni pia cun engraziament tier questa meisa – la tscheina  
ei preparada!

<Informaziuns organisatoricas>

<Communiun dils fideivels>

## **(Uraziun finala)**

Lauda il Segner, mi'olma,  
e tgei ch'ei en mei, siu sogn num dei ludar.  
Lauda il Segner, mi'olma,  
buc emblida tut bien ch'el ha fatg.  
Quel ch'a ti perduna tut tes puccaus,  
medeghescha er tut tias mendas,  
quel che spindra da perdiziun tia veta  
e tei corunescha cun grazia e buntad.  
Buntadeivels, grazius ei il Segner,  
pazients e rehs da buntad.  
El fa buc cun nus secund nos puccaus,  
buc renda a nus tenor nossa cuolpa.  
Sco il tschiel stat ault sur la tiara,  
stat er sia grazia ault sur ses prus.  
E sco la damaun ei dalunsch dalla sera,  
lai el nos puccaus da nus esser lontans.  
Sco in bab sepren puccau da ses fegls,  
ha il Segner carezia per quels che el teman.  
Mes levz dein plidar dalla gliergia dil Segner,  
tutta carn dei siu sogn num celebrar  
adin' ed a semper. Amen